

71 謝太傅寒雪日内集，與兒女講論文義。俄而雪驟，公欣然曰：「白雪紛紛何所似？」兄子胡兒曰：「胡兒，謝朗小字也。」續晉陽秋曰：「朗字長度，安次兄，據之長子。安蚤知之。文義豔發，名亞於玄，仕至東陽太守。」撒鹽空中差可擬。兄女曰：「未若柳絮因風起。」公大笑樂。即公大兄無奕女，左將軍王凝之妻也。王氏譜曰：「凝之字叔平，右將軍羲之第二子也。歷江州刺史、左將軍、會稽內史。」晉安帝紀曰：「凝之事五斗米道。孫恩之攻會稽，凝之謂民吏曰：『不須備防，吾已請大道，許遣鬼兵相助，賊自破矣。』既不設備，遂爲恩所害。」婦人集曰：「謝夫人名道蘊，有文才。所著詩、賦、誄、頌傳於世。」〔二〕

【箋疏】

〔一〕宋陳善捫虱新話三云：「撒鹽空中，此米雪也。柳絮因風起，此鵝毛雪也。然當時但以道韞之語爲工。予謂詩云：『相彼雨雪，先集維霰。』霰卽今所謂米雪耳。乃知謝氏二句，當各有謂，固未可優劣論也。」嘉錫案：二句雖各有謂，而風調自以道韞爲優。

〔二〕丁國鈞晉書校文四曰：「道韞名韞元，見唐陳子良辯正論注。」嘉錫案：唐釋法琳辯正論七云：「謝氏通魂，見亡子而祈福。」子良注引晉錄曰：「瑯琊王凝之夫人，陳郡謝氏，名韞元，奕女也。清心玄旨，姿才秀遠。喪二男，痛甚，六年不開帷幕。忽見二兒還，鉗鎖大械，勸母自寬，云：『罪無得脫，惟福德可免耳。』具敘諸苦，母爲祈福，冀獲福祐也。」廣記三百二十引幽冥錄、法苑珠林四十五興福篇引冥祥記，均有王凝之夫人謝氏見二亡兒事。但無「夫人名韞元」及「清心」以下二語。此所引晉錄不知何書，疑是何法盛晉中興書鬼神錄也，所敘荒誕不足據。

而道韞之名，則諸書所未聞。故從丁氏說，錄之於此，以補孝標注所未備焉。

晉書安帝紀：「隆安三年十一月甲寅，妖賊孫恩陷會稽，內史王凝之死之。」嘉錫案：羲之七子，晉書附傳者五

人，均不言年若干。考其次第，凝之第二，見此注。獻之第七，見品藻篇「桓玄爲太傅」條。傷逝篇注曰：「獻之以

泰元十二年卒，年四十五。」凝之之年，當較獻之十年以長。其死難時，獻之卒已十二年，則凝之壽當六十有餘，

且七十矣。道韞之年，蓋與相若，故晉書列女傳言其爲獻之解圍時，施青綾步障自蔽。及嫠居會稽，見太守劉

柳，乃簪髻素褥，坐於帳中。柳束脩整帶，造於別榻。則因年事已老，無嫌於後生也。

72 王中郎令伏玄度、習鑿齒王中郎傳曰：「坦之字文度，太原晉陽人。祖東海太守承，清淡平遠。父述，貞

貴簡正。坦之器度淳深，孝友天至，譽輯朝野，標的當時。累遷侍中、中書令，領北中郎將，徐、兗二州刺史。」中興書曰：

「伏滔，字玄度，平昌安丘人。少有才學，舉秀才。大司馬桓溫參軍，領大著作，掌國史，遊擊將軍，卒。習鑿齒字彥威，襄

陽人。少以文稱，善尺牘。桓溫在荊州，辟爲從事。歷治中別駕，遷榮陽太守。」論青、楚人物。滔集載其論略曰：

「一」滔以春秋時鮑叔、管仲、隰朋、召忽、輪扁、甯戚、麥丘人、逢丑父、晏嬰、涓子；「二」戰國時公羊高、孟軻、鄒衍、田

單、荀卿、鄒爽、莒大夫、田子方、檀子、魯連、淳于髡、盼子、田光、顏歆、黔子、於陵仲子、王叔；「三」卽墨大夫；前漢時伏

徵君、終軍、東郭先生；「四」叔孫通、萬石君、東方朔、安期先生；後漢時大司徒伏三老、江革、逢萌、禽慶、承幼子、徐防、

薛方、鄭康成、周孟玉、劉祖榮、臨孝存、侍其、元矩、孫賓碩、劉仲謀、劉公山、王儀伯、郎宗、禰正平、劉成國；「五」魏時管